


CELEBRACIÓN EN OS COTOS (na igrexa)

14-15 de outubro do 2023

XXVIII ORDINARIO A



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,
CON RESPONSABILIDADE COIDADORA ANTE A COVID-19
E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

🎵 **1 Que ledos hoxe estamos**

Celebrante:

Benvidos sexamos todos a esta celebración. Reunímonos para compartir en comunidade a nosa fe. Facémolo no nome do Pai e do Fillo e do Espírito Santo.

Sempre que temos unha celebración familiar ou alguén nos convida a un banquete, fai que nos sintamos alegres e tratemos de vivilo con ilusión.

Hoxe Xesús convídanos ao seu banquete e para iso ponnos o exemplo dunha voda. Estamos todos convidados, sen exclusións. A porta está aberta para quen queira participar.

Pero a unha celebración non se vai por ir, nin por cumprir. Vaise con ilusión, con cariño, con interese por participar e poñer o mellor de nós.

Preparémonos a participar na celebración que Xesús preparou hoxe para nós e poñamos nela ilusión, cariño... o mellor de nós.

ACTO PENITENCIAL

Celebrante: *Preparémonos para participar desta invitación que Xesús nos fai neste seu banquete. A mellor maneira é pedir perdón e dispoñernos a compartir na mesa da comunidade:*

Monitor/a

➤ Perdón polas moitas veces nas que renunciamos a encher o noso corazón co perdón, coa comprensión e coa escoita.

Señor, ten misericordia con nós

➤ Perdón porque non estamos dispostos a saír ao camiño da vida para ir ao encontro, invitar, coñecer, acoller e acompañar aos que ninguén invita, reconece, acolle ou acompaña.

Cristo, ten misericordia con nós

➤ Perdón porque a pesares de que todas as persoas somos irmáns aínda queda moita violencia que afoga os camiños da paz.

Señor, ten misericordia con nós

Celebrante: *Deus todopoderoso teña piedade de nós e dos que teñen lugar no noso corazón e nosa vida. A todos nos conceda o perdón e nos leve á vida eterna. Amén*

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior. Co noso corazón doído con todo o que pasa nas terras de Xesús pedímoslle ao Señor que nos axude a sementar paz.*

(silenzo)

Deus, noso Pai,
que a túa graza tome a iniciativa na nosa vida e nos acompañe sempre.

Que nos faga solícitos e constantes na práctica da paz.

Pedímoscho por Xesucristo que vive e reina por sempre eternamente. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *San Paulo ponse de exemplo aos cristiáns de Filipos na súa forma de vivir tamén nos tempos difíciles. Por iso insiste na confianza en Deus, que “cubrirá todas as necesidades conforme á súa riqueza”.*

Pero a confianza en Deus non é deixarse levar, pois el invita e somos nós os que temos que achegarnos. Somos nós os que decidimos se ir ou non. Escoitamos.

LECTURA DA CARTA AOS FILIPENSES

Irmáns e irmás:

Hoxe sei vivir na miseria e na fartura. En calquera situación estou ensinado para estar farto e para pasar fame; para ter de abondo e para non ter nada. Teño forzas para todo grazas a quen me fai forte. Mesmo así, fixestes ben en tomardes coma vos a miña dificultade.

O meu Deus, pola súa parte, cubrirá todas as vosas necesidades, conforme a súa riqueza con magnificencia en Cristo Xesús.

Gloria a Deus, noso Pai, polos séculos dos séculos. Amén.

Palabra do Señor

🎵 **nº 7 Andarei na presenza do Señor** SALMO

(en pé) Leccionario I A páx 267 Mt 22, 1-14 EVANXEO

PROCLAMACIÓN DO SANTO EVANXEO SEGUNDO MATEO

Daquela díxolle Xesús aos sumos sacerdotes e aos anciáns do pobo esta parábola:

Parécese o Reino dos Ceos a un rei que celebrou o casamento de seu fillo. Mandou os seus criados ir chamar polos convidados á voda, pero estes non querían ir.

Volveu mandar outros criados, encargándolles:
- "Dicídelles aos convidados: Mirade que teño preparado o banquete, xa están mortos os becerros e mailos demais animais cebados; todo está disposto: ¡vide á voda!".

Pero eles, sen lles faceren caso, fóronse: un ás súas leiras, outro aos seus negocios. Os demais botáronse aos criados, maltratáronos e matáronos.

Entón o rei, todo indignado, mandou os seus exércitos, que acabaron cos asasinos aqueles e prendéronlle lume á cidade. E díxolles aos criados:

- "A voda está preparada, pero os convidados non a merecían. Así que ide ás encrucilladas dos camiños; e a cantos atopedes, convidádeos á voda".

Saíron aos camiños os criados e xuntaron a todos os que atoparon, bos e malos, enchéndose de convidados a sala da voda.

Palabra do Señor

(sentad@s) gardamos uns instantes de silencio para acoller a palabra no corazón



Unhas palabras a xeito de homilía para pensar en silencio

Estamos invitados:

- “invitados” a vivir a fe sabéndonos invitados. Non estamos obrigados, tampouco o facemos por cumprir, nin é unha rutina máis. É a nosa responsabilidade.
- “invitados” a vivir a vida sendo acolledores, e coidadores de todo e de todos. Algo que se fai fundamental nestes tempos nos que vemos como os camiños e as aldeas que pisou Xesús hoxe afogan os soños da paz baixo unha violencia que se leva a vida por diante.
- “invitados” a vivir a vida dando unha man axudando a que se sintan parte da vida os enfermos, os pobres, os refuxiados, as mulleres que malviven violencia.



(en pé)

PROFESIÓN DA FE

Celebrante

Neste encontro parroquial, comprometémonos a poñer os mellores feitos para coidar e dar froito nesta terra que o Pai pon nas nosas mans. Crer e facer crible é ao que agora o Señor nos convida, e é o que agora compartimos:

♪ *Creo, Señor, pero aumenta a miña fe*

Monitor/a:

Credes en Deus Pai e Nai, que na vontade de amar nos convida a facer da vida unha mesa na que compartir?

♪ *Creo, Señor, pero aumenta a miña fe*

Credes en Xesús, irmán que acolle e convida a todos a acoller, sen facer diferenzas no camiño de sementar paz?

♪ *Creo, Señor, pero aumenta a miña fe*

Credes no Espírito Santo que alenta no corazón para amar construíndo entre todos unha mellor humanidade?

♪ *Creo, Señor, pero aumenta a miña fe*

Credes na igrexa, familia dos homes e mulleres que seguindo os pasos de Xesús queren cooperar facendo do mundo fogar do Reino de Deus?

♪ *Creo, Señor, pero aumenta a miña fe*

ORACIÓN UNIVERSAL

Celebrante: *Oremos confiados e xuntos, a aquel que nos convida a compartir hoxe no seu banquete. Dicimos:*

Grazas, Señor, por convidarnos

Monitor/a:

- ✓ Convidados nesta Igrexa, na que podemos vivir e celebrar a nosa fe coma unha festa que fai renacer a vida e a esperanza nun mundo con demasiada violencia, oremos
- ✓ Convidados nesta Comunidade, na que queremos valorar o traballo que día a día se leva a cabo no empeño de abrir as portas a todos sen diferenza, oremos
- ✓ Convidados nesta Parroquia, na que queremos ser crentes e cribles atendendo e dando unha man para sementar paz, oremos
- ✓ Convidados nesta Humanidade, na que non podemos pechar os ollos ante a traxedia na que viven os refuxiados, oremos
- ✓ Convidados e doídos con toda a violencia que hoxe se vive nas mesmas terras nas que Xesús soñaba paz e fraternidade, oremos

Celebrante: *Grazas Señor por abrirnos as portas da túa casa e convidarnos ao banquete da túa mesa. A Ti que vives e reinas por sempre eternamente. Amén*

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: *Ao Deus que confía en nós e que nos convida ao banquete do Reino, rezámoslle dicindo:*

NOSO PAI ...



SIGNO DA PAZ

Celebrante *Confiemos en Deus, fagamos da vida un convite. Non nos contentemos con facer as cousas por simple obriga e cumprimento, poñámoslle corazón, e así a paz de Deus estará preto de nós e poderemos compartila con todos, como agora estamos dispostos a facer.*

🎵 **nº 36 Fagamos a paz irmáns**

COMUÑÓN

Celebrante: *Participamos hoxe na mesa convidados por Xesús. El abre as portas a todos os que queren compartir con ilusión e cariño este banquete. Poñamos o mellor de nós e sintámonos en familia cos nosos irmáns.*

Ditosos nós que hoxe somos convidados a esta mesa do Señor.

Señor, eu non son merecente de que entres no meu fogar, mais unha palabra túa abonda para me salvar

🎵 **nº 48** *O pouco que Deus nos dá*

4.- AVISOS E DESPEDIDA

ORACIÓN FINAL

Celebrante:

Señor, acompaña coa túa protección constante ao pobo que renovaches na fe compartida coma comunidade.

Ti, que nunca deixaches de nos axudar, fainos merecentes da salvación eterna.

Ti que vives e reinas con nós por sempre eternamente. Amén.

Con Xesús queremos ser unha comunidade que nos sabemos invitados para o coidado da terra e da natureza.

Con Xesús queremos ter un trato xusto e digno cos demais procurando sempre unhas relacións humanas baseadas na igualdade, e na paz que tanto necesitamos.

Que a celebración que agora rematamos nos dea azos para vivir mellorando esta terra que temos nas mans, como nos convida Xesús sementado paz.

Avísase das misas (ver folla do mes)

Que teñamos un bo día, unha boa semana, e o Señor nos bendiga, † nos garde de todo mal e nos leve ao seu fogar de vida eterna. Amén

Podémonos ir en paz



**“Ide ás encrucilladas dos camiños;
e a cantos atopedes, convidádeos”.**

**“Saíron aos camiños
e xuntaron a todos os que atoparon”**

Palabras na parábola de Xesús no evanxeo de hoxe.